

Na osnovu člana 37. i člana 81. Statuta Općine Novi Grad Sarajevo („Službene novine Kantona Sarajevo“, br. 30/09 – novi prečišćeni tekst), člana 5. Odluke o podsticajima u poljoprivrednoj proizvodnji („Službene novine Kantona Sarajevo“, broj: 14/2017) i člana 3. Programa podsticaja razvoju poljoprivredne proizvodnje za 2017. godinu broj: 02/03-24- 9996/17 od 15.05.2017. godine, a na prijedlog Službe za privredu i lokalni ekonomski razvoj Općinski načelnik donosi

Pravilnik o posebnim uslovima i načinu ostvarivanje prava na novčane podsticaje u oblasti poljoprivredne proizvodnje – direktni novčani podsticaji za tekuću poljoprivrednu proizvodnju

I OSNOVNE ODREDBE

Član 1.

(Vrste novčanih podsticaja)

Ovim Pravilnikom utvrđuju se posebni uslovi i način ostvarivanja prava na novčane podsticaje iz člana 2. stav 1. tačka 1 Odluke o podsticajima u poljoprivrednoj proizvodnji („Službene novine Kantona Sarajevo“, broj: 14/2017) – direktni novčani podsticaji za tekuću poljoprivrednu proizvodnju (u daljem tekstu: Odluka) i to za :

- a) animalnu proizvodnju,
- b) biljnu proizvodnju,
- c) gljivarsku proizvodnju,
- d) certificiranje proizvodnje,
- e) investiranje u poljoprivredna gazdinstva,
- f) ostale vrste novčanih podsticaja.

Član 2.

(Nosilac aktivnosti)

Služba nadležna za poslove poljoprivrede je nosilac aktivnosti vezanih za realizaciju direktnih novčanih podsticaja iz člana 1. ovog Pravilnika a u skladu sa Odlukom.

Član 3.

(Pravo na apliciranje za ostvarivanje prava na direktne novčane podsticaje)

Pravo na apliciranje za ostvarivanje prava na direktne novčane podsticaje iz člana 2. stav 1. tačka 1. Odluke imaju :

- fizička lica (neregistrovana i registrovana lica u skladu sa Zakonom o obrtu i srodnim djelatnostima) koja imaju prebivalište na području Općine Novi Grad Sarajevo, upisana su u Registar poljoprivrednih gazdinstava i Registar klijenata u skladu sa Zakonom o poljoprivredi („Službene novine Federacije BiH“, br. 88/07 i 4/10) (u daljem tekstu: kandidat) i koja su poljoprivrednu proizvodnju zasnovala:

- a) za vrste podsticaja navedene u tabeli datoj u članu 8. Odluke pod tačkom 1a); 1b); 3) i 4) na području Općine Novi Grad Sarajevo,
- b) za vrste podsticaja navedene u tabeli datoj u članu 8. Odluke pod tačkom 2) na području Kantona Sarajevo,
- c) za vrste podsticaja navedene u tabeli datoj u članu 8. Odluke pod tačkom 1c); 1d); 1e); 5) i 6) na području BiH.

Ukoliko kandidat podnese više zahtjeva za novčane podsticaje po raznim osnovama maksimalni iznos koji se može ostvariti - isplatiti za sve podnesene zahtjeve je 2.000,00KM.

Kandidati koji su ostvarili pravo na novčani podsticaj na osnovu dostavljenih Projekata pod tačkom 6a) Odluke u prethodnoj godini, a ne dostave dokaz o namjenskom trošenju isplaćenih finansijskih sredstava ili tokom monitoringa nadležna služba utvrdi ne namjensko trošenje isplaćenih finansijskih sredstava nemaju pravo na novčani podsticaj za tekuću godinu na osnovu Odluke.

Član 4.

(Novčani iznosi i normativi za direktne novčane podsticaje)

R/B	VRSTA PODSTICAJA	IZNOS U KM/JEDINIC I MJERE (fizička neregistrovana lica)	IZNOS U KM/JEDINICI MJERE (registrovana fizička lica- dopunska djelatnost	IZNOS U KM/JEDINICI MJERE (registrovana fizička lica- osnovna djelatnost)	NAJMANJE NORME I LIMITI ZA PODSTICAJ
	1) ANIMALNA PROIZVODNJA				
1.a)	Uzgoj i držanje matičnog stada muznih krava- farma mlječnih krava koja nije u sistemu otkupa mlijeka	105,00 KM/grlo	120,00 KM/grlo	150,00 KM/grlo	3-10 grla
1.b)	Podsticaj za uzgoj i držanje priplodnih junica	175,00 KM/grlo	200,00 KM/grlo	250,00 KM/grlo	2-5 grla
1.c)	Farna ovaca (sve kategorije starije od 6 mjeseci)	9,10 KM/grlo	10,40 KM/grlo	13,00 KM/grlo	40-100 grla
1.d)	Farma koza samo u stajskom uzgoju ili pod nadzorom u ograđenim prostorima	9,10 KM/grlo	10,40 KM/grlo	13,00 KM/grlo	25-100 grla
1.e)	Uzgoj i držanje pčelinjih društava	8,40 M/pčelinje društvo	9,60KM/pčelinje društvo	12,00KM/pčelinje društvo	30 do 100 pčelinjih društava
	2) BILJNA PROIZVODNJA				
2.a)	Zasnivanje novih zasada krošnjastog voća	175,00 KM/ o,1ha	200,00KM/0,1ha	250,00 KM/0,1ha	0,2ha-0,5 ha jedne vrste voća sa prosječnom normom sadnje za određenu vrstu (jedna parcela min. 0,1 ha)
2.b)	Zasnivanje novih zasada jagodastog voća	175,00 KM/ 0,1ha	200,00KM/0,1ha	250,00KM/0,1ha	0,2 ha- 0,5 jedne vrste voća sa prosječnom normom sadnje za određenu vrstu(jedna parcela min 0,1ha)

2.c)	Plastenička proizvodnja	1,00KM/m2	1,25KM/m2	1,43KM/m2	min.200m2-1000m2 (min. 200m2 jedne kulture koja može biti zastupljena u više plastenika)
	3) GLJIVARSKA PROIZVODNJA- proizvodnja u zatvorenom prostoru	-/-	28,00KM/tona komposta po kvartalu	35,00KM/tona komposta po kvartalu	Min.10t-max.30t
	4) CERTIFICIRANJE PROIZVODNJE (organska proizvodnja, halal, HACCP certificiranje i dr.)	25% od računa za certificiranje	28 %od računa za certificiranje	35% od računa za certificiranje	
	5) INVESTIRANJE U POLJOPRIVREDNA GAZDINSTVA				
5.a)	Nabavka nove poljoprivredne mehanizacije i priključnih sredstava, nove opreme u biljnoj i animalnoj proizvodnji	25 % od vrijednosti računa	28% od vrijednosti računa	35 % od Od vrijednosti računu	
5.b)	Nabavka novog plastenika	25% od vrijednosti računa	28% od vrijednosti računa	35% od vrijednosti računa	min.100m ² – 500m2
5c)	Nabavka priplodnih junica	297,00KM/junica	340,00 KM /junica	425, KM/junica	Min. 1-max 5
	6) MODEL OSTALIH VRSTA NOVČANIH PODSTICAJA- u zavisnosti od raspoloživih finansijskih sredstava				
6a)	podsticaj kroz sufinansiranje realizacije pojedinačnih Projekata za zasnivanja kao i proširivanju uspostavljene poljoprivredne proizvodnje kroz oblik direktnih podsticaja za nabavku repromaterijala, sredstava za rad i opreme, i sl.)	Maximalno 1.400 KM/projekat	Maximalno 1.600,00 KM	maximalno 2.000 KM/projektu	maximalno 1 projekat

II POSEBNI USLOVI

1. Animalna proizvodnja

Član 5.
(Uslovi za držanje životinja)

Pravo na direktni novčani podsticaj iz oblasti animalne proizvodnje može ostvariti kandidat koji drži stoku na području na kojem je dozvoljeno držanje stoke u skladu sa Odlukom o držanju stoke na

području Kantona Sarajevo („Službene novine Kantona Sarajevo“, broj: 17/16), Odlukom o držanju domaćih životinja na teritoriji Općine Novi Grad Sarajevo – dozvoljeno područje, uslovi i način držanja („Službene novine Kantona Sarajevo“, broj: 10/15) odnosno u skladu sa materijalnim propisima koji regulišu navedeno na teritorijama drugih općina na području BiH.

Kandidat koji ostvari pravo na direktni novčani podsticaj iz oblasti animalne proizvodnje dužan je da drži stoku u skladu sa Zakonom o stočarstvu („Službene novine FBiH“, broj 66/13) i drugim zakonskim i podzakonskim propisima koji regulišu ovu oblast.

Član 6. (Veterinarski nadzor životinja)

Kandidat koji želi ostvariti pravo na direktne novčane podsticaje dužan je držati stoku pod stalnim veterinarskom nadzorom kao i da posjeduje životinje obilježene propisanim ušnim markicama u skladu sa propisima iz oblasti veterinarstva, odnosno u skladu sa odredbama Pravilnika o obilježavanju i kontroli kretanja životinja u BiH („Službeni glasnik BiH“, broj 13/10, 79/10 i 25/11) (u daljem tekstu: Pravilnik o obilježavanju životinja).

Za stoku za koju nadležna veterinarska organizacija konstatuje da ima zaraznu bolest kandidat ne može ostvariti pravo na direktne novčane podsticaje.

Član 7. (Uzgoj i držanje matičnog stada muznih krava)

Za ostvarivanje prava na direktni novčani podsticaj za uzgoj i držanje matičnog stada muznih krava kandidat treba da ispunjava sljedeće posebne uslove:

- da posjeduje muzne krave tokom cijele godine,
- da posjeduje mliječne kartone za krave,
- da u toku uzgoja kontinuirano provodi veterinarske mjere zdravstvene zaštite životinja.

Član 8. (Uzgoj i držanje priplodnih junca)

Za ostvarivanje prava na direktni novčani podsticaj za uzgoj i držanje priplodnih junca kandidat treba da ispunjava sljedeće posebne uslove:

- da u toku uzgoja kontinuirano provodi veterinarske mjere zdravstvene zaštite životinja,
- da je junica vještački osjemenjena sa navršenom starošću od najmanje 12 mjeseci,
- da je utvrđena steonost junice od najmanje četiri mjeseca,
- da će junicu držati u uzgoju najmanje dvije godine.

Član 9. (Farma ovaca)

Za ostvarivanje prava na direktni novčani podsticaj za farmu ovaca kandidat treba da ispunjava sljedeće posebne uslove:

- da posjeduje farmu ovaca,
- da u toku uzgoja kontinuirano provodi mjere veterinarske zdravstvene zaštite životinja,
- prilikom utvrđivanja činjeničnog stanja na licu mjesta obezbjedi prisustvo stoke na prikladnom mjestu (u štali, toru i oboru).

Član 10.
(Farma koza)

Za ostvarivanje prava na direktni novčani podsticaj za farmu koza kandidat treba da ispunjava sljedeće posebne uslove:

- da posjeduje farmu koza u stajskom uzgoju ili pod nadzorom u ograđenom prostoru,
- da u toku uzgoja kontinuirano provodi mjere veterinarske zdravstvene zaštite životinja.

Član 11.
(Podsticaj za pčelarstvo)

Za ostvarivanje prava na direktni novčani podsticaj za pčelarstvo kandidat treba da ispunjava sljedeće posebne uslove:

- da posjeduje pčelinjak označen tablom na kojoj je upisan broj pčelinjih društava i ime vlasnika,
- da u toku uzgoja kontinuirano provodi mjere veterinarske zdravstvene zaštite životinja,
- da je član registrovanog udruženja pčelara na području Kantona Sarajevo.

2. Biljna proizvodnja

Član 12.
(Zasnivanje novih zasada voća)

Za ostvarivanje prava na direktni novčani podsticaj za zasnivanje novih zasada krošnjastog ili jagodičastog voća u toku kalendarske godine u kojoj je objavljen javni poziv za ostvarivanje prava na novčani podsticaj, kandidat treba da ispunjava sljedeće posebne uslove:

- da je vlasnik (ZK izvadak) ili posjednik (prepis posjedovnog lista) ili da ima u zakupu minimalno 0,2 ha poljoprivrednog zemljišta na području Kantona Sarajevo (Ugovor o zakupu zemljišta na period najmanje od 5 godina sa ZK izvadkom zakupodavca) na kojem je zasnovao zasad i proveo odgovarajuće agrotehničke mjere,
- da je u tekućoj godini kupio deklarisanu sadnu materijal u količini koja je prosječni normativ za određenu vrstu u skladu sa normativima datim u članu 28. Stav 3. Pravilnika o posebnim uslovima za ostvarivanje prava na novčani podsticaj ("Službene novine Kantona Sarajevo", broj: 21/13 i 39/14).

Član 13.
(Plastenička proizvodnja)

Za ostvarivanje prava na direktni novčani podsticaj za plasteničku proizvodnju kandidat treba da ispunjava sljedeće posebne uslove:

- da je vlasnik (ZK izvadak) ili posjednik (prepis posjedovnog lista) ili da ima u zakupu minimalno 0,2 ha poljoprivrednog zemljišta na području Kantona Sarajevo (Ugovor o zakupu zemljišta na period najmanje od 5 godina sa ZK izvadkom zakupodavca) na kojem je postavljen platenik - objekat višegodišnje namjene čija konstrukcija je prekrivena namjenskom folijom, površine ne manje od 60m², a visine ne manje od 2,5m u centralnom dijelu objekta,
- da je zasnovao plasteničku proizvodnju minimalno 200m² jedne kulture povrtnih kultura ili jagodičastog voća na kojim je proveo odgovarajuće agrotehničke mjere, a što će se utvrditi na osnovu zatečenog stanja zastupljene kulture u plateniku.

3. Gljivarska proizvodnja

Član 14.

(Podsticaj za gljivarsku proizvodnju)

Za ostvarivanje prava na direktni novčani podsticaj za gljivarsku proizvodnju kandidat treba da ispunjava sljedeće posebne uslove:

- da se bavi proizvodnjom gljiva na kupljenom miceliju u zatvorenom prostoru,
- da posjeduje fakturu i fiskalni račun o kupovini komposta za svaki proizvodni ciklus ukoliko se radi na području BiH, a ukoliko se radi o kupovini van područja BiH dokaz o izvršenoj uplati po računu.
- da za kompost sa micelijem posjeduje fitopatološki nalaz od nadležne institucije za proizvodnju gljiva za svaki proizvodni ciklus,

Za kvartale proizvodnje iza datuma objavljivanja javnog poziva kandidat ostvaruje pravo na podsticaje u narednoj kalendarskoj godini.

4. Certificiranje proizvodnje

Član 15.

(Certificiranje proizvodnje)

Za ostvarivanje prava na direktni novčani podsticaj za certificiranje proizvodnje kandidat treba da ispunjava sljedeće posebne uslove:

- da je završio proces certificiranja organske proizvodnje, halal certificiranje, HACCP certificiranje i dr. u tekućoj godini kod međunarodno priznate certifikacijske kuće.

5. Investiranje u poljoprivredna gazdinstva

Član 16.

(Nabavka nove mehanizacije i priključnih sredstava i nove opreme u biljnoj i animalnoj proizvodnji)

Za ostvarivanje prava na direktni novčani podsticaj za nabavku nove mehanizacije i priključnih sredstava, nove opreme u biljnoj i animalnoj proizvodnji kandidat treba da ispunjava sljedeće posebne uslove:

- da je kandidat u tekućoj godini kupio novu mehanizaciju i priključna sredstava i novu opremu u biljnoj i animalnoj proizvodnji,
- da je registrovao mehanizaciju koja podliježe registraciji.

Pod poljoprivrednom mehanizacijom podrazumjeva se kombajn, traktor, motokultivator minimalne snage 6kW i kosačica minimalne snage 4 kw.

Pod priključnim sredstvima podrazumjevaju se odgovarajući priključci za traktor i motokultivator minimalne snage 6 kw.

Oprema u biljnoj proizvodnji podrazumjeva sistem za navodnjavanje, komorne sušare za voće, povrće i ljekovito bilje.

Oprema u animalnoj proizvodnji podrazumjeva jedan element ili kompletan sistem za hranjenje, pojenje, rashlađivanje, zagrijavanje i izdubivanje.

Kandidat ima pravo podnijeti zahtjev za ostvarenje novčanog podsticaja za kupovinu jedne vrste mehanizovanog sredstva i priključnog sredstva i opreme u biljnoj i animalnoj proizvodnji.

Kandidat ima pravo podnijeti novi zahtjev za ostvarenje prava na novčani podsticaj za nabavku iste vrste mehanizacije i priključnog sredstva, opreme u biljnoj i animalnoj proizvodnji nakon isteka roka od tri godine od dana ranije ostvarenog novčanog podsticaja.

Član 17.
(Nabavka novih plastenika)

Za ostvarivanje prava na direktni novčani podsticaj za sufinansiranje nabavke novog plastenika kandidat treba da ispunjava sljedeće posebne uslove:

- da je u tekućoj godini kupio nov plastenik,
- da plastenik koristi lično i da je isti postavljen na poljoprivrednom zemljištu za koje je zakonit korisnik (vlasnik ili posjednik) ili na zakupljenom poljoprivrednom zemljištu za period ne manji od pet godina,
- da je u istom zasnovao poljoprivrednu proizvodnju.

Član 18.
(Nabavka priplodnih junica)

Za ostvarivanje prava na direktni novčani podsticaj za sufinansiranje nabavke priplodnih junica za formiranje ili proširenje osnovnog stada mliječnih krava kandidat treba da ispunjava sljedeće posebne uslove:

- da je u tekućoj godini kupio priplodne junice,
- da se junice otele na gazdinstvu,
- da kupljene junice uzgaja u vlastitoj proizvodnji naredne 3 godine.

6) Ostale vrste novčanih podsticaja

Član 19.
(Pojedinačni Projekti)

U okviru ostalih vrsta direktnih novčanih podsticaja može se podržati realizacija pojedinačnih Projekata iz oblasti poljoprivredne proizvodnje kao podrška kroz sufinansiranje zasnivanja kao i proširivanje uspostavljene poljoprivredne proizvodnje kroz oblik direktne podrške za nabavku repromaterijala, sredstava za rad i opreme i sl, a za koje Komisija za odobravanje novčanih podsticaja ocijeni da su značajna u smislu otvaranja novih radnih mjesta u sektoru poljoprivrede kroz stvaranje samoodrživih farmi.

Član 20.
(Visina odobrenih sredstava)

Iznos odobrenih finansijskih sredstava utvrdit će Komisija za odobravanje direktnih novčanih podsticaja za svaki zahtjev pojedinačno na osnovu dostavljenog Projekta u zavisnosti od raspoloživih finansijskih sredstava, a u skladu sa članom 8. stav 1. tačka 6a) Odluke.

III POSTUPAK ZA OSTVARIVANJE PRAVA NA DIREKTNE NOVČANE PODSTICAJE

Član 21.
(Javni poziv)

Općinski načelnik, na prijedlog nadležne službe za poslove poljoprivrede, objavljuje najmanje jednom godišnje Javni poziv za podnošenje zahtjeva za ostvarivanje prava na novčane podsticaje - direktni novčani podsticaji za tekuću poljoprivrednu proizvodnju.

Javni poziv sadrži: uslove koje kandidat mora ispunjavati, kriterije za dodjelu direktnih novčanih podsticaja, rok za podnošenje prijave, dokumentaciju koju kandidat treba da priloži i eventualno druge potrebne podatke.

Javni poziv se objavljuje u dnevnim novinama, web stranici i oglasnoj ploči Općine Novi Grad Sarajevo.

Član 22.
(Podnošenje zahtjeva)

Zahtjevi za dodjelu direktnih novčanih podsticaja na osnovu Javnog poziva iz člana 20. ovog pravilnika se podnose Komisiji za odobravanje direktnih novčanih podsticaja putem nadležne službe za poslove poljoprivrede na originalnom obrascu koji se preuzima na Info-punktu općine kao i web stranici općine.

Zahtjev za ostvarivanje prava na direktni novčani podsticaj u ime kandidata porodičnog poljoprivrednog gazdinstva podnosi nosilac poljoprivrednog gazdinstva, a za registrovano fizičko lice ovlašteno lice.

Za ostvarivanje prava na direktne novčane podsticaje kandidat je dužan podnijeti poseban pojedinačni zahtjev za svaku vrstu novačanog podsticaja.

Član 23.
(Utvrdjivanje činjeničnog stanja)

Komisija za odobravanje direktnih novčanih podsticaja dostavlja nadležnoj službi za poslove poljoprivrede zahtjev za utvrđivanje na licu mjesta činjeničnog stanje o ostvarenoj proizvodnji za podnesene zahtjeve za direktne novčane podsticaje za proizvodnje zasnovane na području općine Novi Grad Sarajevo i kantona Sarajevo navedene u tabeli datoj u članu 8. Odluke pod tačkom 1), 2), 3) i 6).

Ukoliko je poljoprivrednu proizvodnju podnosilac zahtjeva za direktne novčane podsticaje navedene u stavu 1. ovog člana zasnovao van područja Kantona Sarajevo dokazuje činjenično stanje o ostvarenoj proizvodnji potvrdom (uvjerenjem) o obavljanju poljoprivredne proizvodnje nadležne općinske službe na kojoj je zasnovana poljoprivredna proizvodnja.

Nadležna služba za poslove poljoprivrede zadržava pravo da višekratnom provjerom do isteka kalendarske godine utvrdi činjenično stanje o ostvarenoj proizvodnji.

Član 24.
(Izbor kandidata za dodjelu direktnih novčanih podsticaja)

Komisiju za odobravanje direktnih novčanih podsticaja imenuje Općinski načelnik.

Zadatak Komisije je: pregled prispjelih prijava i dokumentacije i utvrđivanje liste - prijedloga kandidata za dodjelu finansijskih sredstava po objavljenom Javnom pozivu, a na osnovu utvrđenih kriterija u Javnom pozivu u skladu sa raspoloživim finansijskim sredstvima.

Utvrđena lista – prijedlog kandidata za dodjelu finansijskih sredstava se dostavlja Općinskom načelniku.

Svaki kandidat koji je podnio zahtjev za ostvarivanje prava na direktne novčane podsticaje na osnovu Javnog poziva može u roku od 8 dana od dana objavljivanja konačne liste podnijeti prigovor Općinskom načelniku koji donosi konačnu Odluku o prigovoru.

Konačna lista kandidata kojima su dodijeljena finansijska sredstva biće objavljena na web stranici i oglasnoj ploči Općine Novi Grad Sarajevo.

Kandidati koji su ostvarili pravo na direktni novčani podsticaj potpisuju Ugovor sa Općinom Novi Grad Sarajevo kojim će biti regulisana međusobna prava i obaveze.

Član 25.
(Monitoring i evaluacija)

Nadležna služba za poslove poljoprivrede vrši monitoring nad realizacijom Ugovora u periodu od 1 (slovima: jedne) godine od dana dodjele finansijskih sredstava.

Nakon isteka perioda monitoringa nad realizacijom Ugovora nadležna služba za poslove poljoprivrede je dužna izvršiti evaluaciju efekata dodijeljenih budžetskih sredstava za novčane podsticaje u oblasti poljoprivredne proizvodnje – direktni novčani podsticaji za tekuću poljoprivrednu proizvodnju na osnovu raspisanog Javnog poziva za podnošenje zahtjeva za ostvarivanje prava na novčane podsticaje - direktni podsticaji za tekuću poljoprivrednu proizvodnju.

Član 26.

Ovaj Pravilnik stupa na snagu danom donošenja, a biće istaknut na oglasnoj ploči i web stranici Općine.

Obradila: Stručna savjetnica Katana Amna

Po ovlaštenju Općinskog načelnika
Pomoćnik Općinskog načelnika

Džemaludin Kahrović , dipl.ecc

OPĆINSKI NAČELNIK

mr. Semir Efendić

Broj: _____
Sarajevo, _____ 2017. godine

Dostaviti:

1. Služba kabineta Općinskog načelnika,
2. Služba za privredu i lokalni ekonomski razvoj,
3. U spis,
4. Arhiva.

O b r a z l o ž e n j e

Pravni osnov za Pravilnik o posebnim uslovima i načinu ostvarivanja prava na novčane podsticaje u oblasti poljoprivredne proizvodnje – direktni novčani podsticaji za tekuću poljoprivrednu proizvodnju sadržan je u odredbama:

- člana 37. i člana 81. Statuta Općine Novi Grad Sarajevo (“Službene novine Kantona Sarajevo”, broj: 30/09 – novi prečišćeni tekst),
- člana 5. Odluke o podsticajima u poljoprivrednoj proizvodnji (“Službene novine Kantona Sarajevo”, broj: 14/2017)
- člana 3. Programa podsticaja razvoju poljoprivredne proizvodnje za 2017. godinu broj: 02/03-24-9996/17 od 15.05.2017. godine

Razlog donošenja Pravilnika

Razlog donošenja navedenog Pravilnika je potreba da se istim utvrde posebni uslovi za ostvarivanje novčanih podsticaja definisanih članom 2. stav 1. tačka 1. Odluke o podsticajima u poljoprivrednoj proizvodnji („Službene novine Kantona Sarajevo“, broj: 14/2017) – direktni novčani podsticaji za tekuću poljoprivrednu proizvodnju.

Sadržaj Pravilnika:

- Osnovne odredbe
- Posebni uslovi za
 - a) animalnu proizvodnju,
 - b) biljnu proizvodnju,
 - c) gljivarsku proizvodnju,
 - d) certificiranje proizvodnje,
 - e) investiranje u poljoprivredna gazdinstva,
 - f) ostale vrste novčanih podsticaja.
- Postupak za ostvarivanje novčanih podsticaja

Finansijska sredstva za realizaciju navedenog Pravilnika planirana su Budžetom Općine Novi Grad Sarajevo– Tekući transfer za podsticaj poljoprivredne proizvodnje, ekonomski kod 614410 u iznosu od 219.000 KM.